



15. august 2022

UKA2022/35

Inatsisartut suleriaasianni § 33 naapertorlugu matumuuna inatsisartunut aalajangiiffigisassatut siun-nersuut imaattoq saqqummiuppara:

**Isertuussanik kalerriisartut pillugit inatsisissamik kalerriisartunik illersuisussamik Naalackersuisut piareersaallutillu siunnersuuteqarnissaannik, suliassallu tamatuma aalajangiiffigisassatut siunnersuut manna akuersissutigineqarniaripat aallartinneqarnissaannik, peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq, Asii Chemnitz Narup, Inuit Ataqatigiit)

## **Tunngavilersuut**

Nunatsinni Isertuussanik kalerriisartut ullumikkut 'silaannaqanngitsumilusooq' inissisimapput, tassa isertuussanik kallerriisartut imaluunniit kalerriutiginiarneqartut qanoq inatsisitigut illersorneqassanersut inatsisitigut najoqqutassanik erseqqissunik peqqanngimmat.

24. juni 2021, Folketingip isertuussanik kalerriisarneq pillugu inatsit una akuersissutigaa: [inatsit nr. 1436 whistlerblowerit illersorneqarnissaannik inatsit](#) (isertuussanik kalerriisarnermut inatsit). EU-p malittareqqusaa (EU) 2019/1937 EU-p inatsisaanik unioqqutitsisunik inunnik nalunaarutiginnittunik illersuisoq, taamaalilluni Qallunat Nunaanni malitseqartinneqarpoq.

Ammasumik, ingerlatsivinnilu maleruaqqusat atorneqarlutik ingerlanneqarnissaat qulakkeerniarlugu asulisut suleqatillu allat pissutsinik

isumakulunnartunik ilisimannittut, periarfissaqartariaqarput ilisimasaminnik saqqummiussinissaannut, tamanna imminut ajortumik, assersuutigalugu soraarsitaasinnaanermik kinguneqartinneqarnissaa aarleqqutigina.

Pissutsit eqqunngitsunik ingerlatsiviusut arlallit piffissami kingullermi saqqummiunneqartarnerinut isertuussanik kalerriisartut qutsavissaraavut. Isertuussanik kalerriisartut amerlanerusut sapiissuseqarlutik saqqummiussisarnissaannut pisariaqarpoq taakku illersorneqarnissaat.

Taamaasilluni whistleblowerinut inatsisip whistleblowerip paasissutissanik nalunaarutigineqartussanik katersuinissaanut akisussaatinneqannginnissaanut illersortussavaa, paasissutissat katersorneqartut inatsisinik unioqqutitsilluni pillarneqaataasinnaasumik pissarsiarineqarsimanngippata.

Isertuussanik kalerriisartuttaaq ajunngitsumik siunertaqarluni isertuussanik kalerriisarnermut aqqissuussinermut nalunaaruteqarsimasoq, inatsisitugut aalajangersakkamik nipangiussisussaataitanermik unioqqutitsisimasutut akisussaatinneqartassanngilaq.

Isertuussanik kalerriisartooq pillaatitut akiniaaffigineqarsinnaanissaminut illersorneqartassaaq, matumanissaaq pillaatitut akiniaaffigineqarsinnaanermik siorasaarutinik, imaluunniit isertuussanik kalerriisartooq, isertuussanik kalerriisarnermut aqqissuussamut, nalunaaruteqarsimatillugu akiniaaniaraluarnermut aamma illersorneqassalluni. Isertuussanik kalerriisartuttaaq nalunaaruteqarniarnera akornuserneqassanngilaq, akornuserniaraluarneqassananiluunnit.

Naatsumik oqaatigalugu isertuussanik kalerriisartooq suliffiup arlaatigulluunniit pillarsinnaassanngilaa, isertuussanik kalerriisartooq ajunngitsussaaq siunertaralugu paasissutissanik ilumoorsorisaminik tunniussisimappat. Isertuussanilli kalerriisartooq nalunaaruteqartoq suliffiup arlaatigut malersornialissagaluarpagu, isertuussanik kalerriisartup piomasaaqatigisinnaavaa, malersuinerup/pillaatitut akiniaanerup

kingunerisaanut taarsiiffigineqarnissani, isertuussanik kalerriisartup uppersarsinnaaguniuk nalunaarutigisani inatsit eqqorlugit pisimasoq.

Inatsisissap akuersissutigineqarneranut atatillugu aamma pingaaruteqartuuvooq suliffeqarfiit pisortallu piumaffigissallugit sulisuminnut, suleqatitsiminnullu allat, isertuussanik kalerriisarnermut aaqqissuussinermik ilitsersuusioqqullugit, paasinarsisillugu isertuussanik kalerriisarnermut aaqqissuussineq qanoq atorineqassanersoq.

Inunnut paasissutissanik (data) nakkutilliinermut tunngasunik nalunaaruteqarsinnaatitaanermut suliaqarsinnaatitaanermullu assingusumik whistlerblowerit nalunaaruteqartarfissaannik tamanut attuumassuteqanngitsumik pilersitsisoqartariaqarportaaq. Assersuutigalugu isumaliutigineqarsinnaavoq Datatilsynip pisinnaatitaaffii aamma Nunatsinnut atuutsinneqalissanersut.

Inuit Ataqtigiinni isumaqarpugut Nunatsinni peqquserlunnernik aamma pissutsinik nalorninartunik nalunaarutiginnittarnissamut qulakkeerinnittariaqartugut. Isertuussanik kalerriisartut ataasiakkaat qununatik nalunaarutiginnittassappata, inuit ataasiakkaat illersorneqarnissaat pisariaqarpoq. Isertuussanik kalerriisartunut inatsisip illersuinissaq taanna qulakkiissavaa. Taamaattumik siunnersuut una saqqummiuppaa, neriulluni Inatsisartuni partiit allat siunnersuut ilalersorluarumaaraat.

### **Pisortanut aningaasatigut allaffissornikkullu kingunerisassai:**

Inatsisissamut siunnersuut taamatut isikkoqartillugu akuerineqassappat pisortanut suliffeqarfinnullu aningaasaqarnikkut allaffissornikkullu sunniuteqartussaavoq. Alloriarneq siulleq tassaassaaq inatsisissap siunnersuusiarineqarnissaa. Missingersukannerlugu pisariaqartinneqassaaq sulineq ukiumut A/C – fuldmægtig, sulinerata 1/10-lia, 50.000 kr-inik naleqarsinnaasoq.

**Namminersorluni inuussutissarsiuteqarnermut aningaasatigut  
allaffissornikkullu kingunerisassai:**

Soqanngilaq

**Innuttaasunut aningaasatigut allaffissornikkullu kingunerisassai:**

Soqanngilaq